

De Hochtid


Jan komm kille mej, kill mej doch en betjen,
van Omend inne Mondeschin, komm bej ons in't Gärtjen.
Jan komm dröck mej es, dröck mej van alle Sijen,
van Omend inne Mondeschin, ek mag dej so gut lijen.
Jan komm köss mej es, gew mej doch en Küssken,
van Omend inne Mondeschin, op min lecker Schnüsken.
Jan komm nehm mej doch, nehm mej för't ganze Lewen,
of Sonnen- oder Mondeschin, ek well dej alles gewen.

Met dat killen, dröcken on kössen wor et gut on well bej Pötters Anneken on öhren Liewsten Wempes Jan äwer met dat „nehmen för't ganze Lewen“ hat et de ganze Johren mau ütgesihn. Schöld an die johrelange Frejerej hat Annekes Moder, Pötters Drüj, die wor nit gemäklech. Die hat an alles wat ütdesetten. Ok öwer Jan hat sej ömmer wat de nötteln. „Den kömmt van kleine Lüj, dor set necks drachter on den düt de Mul nit los, oder man mot öhm en glöneg Porriser¹⁾ ane Fott halen,“ sag sej tegen Anneken. Die liet sech dorin necks gesegen. Jan wor well en betjen eigen on man moß öhm af on tu en Deuj gewen. Heij wor äwer en treuen Zocks. Wenn heij ok blos en klein Bürken wor, heij wor flitteg on kom op sine Krom derech. Anneken wor op öhr Vader gerojen, net boldereg on ömmer senneg. Sej liet nit van Jan af on nou wor et dann sowit. Inne Märt soll de Hochtid sin. Op et Amt hadden sej sech all inschriewen loten on op Pöttershof gung et dröwer on dronder. Die alde Pötters liet et sech nou nit nehmen, et soll en ganz grote Hochtid gewen. Verthin Dag vörher moß de kromme Mattes alle Verwandten on Nobers inlajen. Den wor vör et ganze Dörp den Hochtidsbitter, den ok Liklüj bejen dej. Dann trok heij sinen posbesten Anzug an on met en Spazierstock met bonte Bänders gung heij noh all die Gäst, die Pötters öhm in en Notizbuk opgeschrewen hadden. In dat Büksken hat heij en Zettel leggen met den Spruch drop, den heij bej die Lüj opseggen moß. Den Spruch hat heij ütwendeg gelehrt, äwer wenn Mattes öwerall en Schnäpsken gekregen hat, dej heij aflesen.

1) Stoechisen

Den Spruch lügen so:

Gujen Morgen all meteen, gujen Morgen liewe Lüj!
Ek sin van Dage op de Been, för Pötters Derk on sine Drüj.
Öhr Anneken on den Wempmes Jan, die wellen trauen
ine Märt,
doröm komm ek nou bej Ou an, wie sech dat bej Nobers
well gehört.
Ingelajen sind Gej all, Vader, Moder, on de Blagen
on wie alles kommen sall, kreg Gej van mej vörgedragen.
De seste Märt, dann so öm vier, düt den Pastor die beiden
trauen.
Dann gew et Eten, Schnaps on Bier, genug för alle Kerls
on Frauen.
Musik för't danzen es bestellt, den Knelles met de
Trekkas kömmt
on dat et an Gejux nit fehlt, dat es, so mein ek, ganz
bestemmt.



Wenn Mattes sin Sprüchskén op gesag hat, kreg heij en Schnäpsken on en bond Bändjen an sinen Stock on en paar Groschen Drenkgeld.

Vertihn Dag later wor et dann so wit. Omes vör de Hochtíd kómen die jonge Lüj üt de Noberschop bejeen öm de kränzen. Dännengrün on Hölskrabbén²⁾ hadden die Jonges Omes vörher üt de Bösch gehalt on bej en Notnóber wodden die Kränz feddeg gemak, en Kranz för de Husdör, för den Hochtídwagen on för et Perd on för die Brutslüj öhre Stühl gow et en Kranz üt Palm.³⁾ Die jonge Fraulüj mossen Papierröskes derech maken. Ok en Reep⁴⁾ wodden derech gelag öm den Hochtídwagen opdehalen. För die Kränzers gow et Schnaps on Bier on sej wodden för de Kränzzech en Dag noh de Hochtíd ingelajen. För de Hochtíd wor nou alles parat. Kuk on Stut wor höpswis gebacken, en fett Pog on en Rend geschlach, thin Anker Bier on Körffleschen met Schnaps logen ine Kelder. „Nou kann et mintwegen los gohn,“ sag Pötters Drüj. On et gung los wie noch nie. Noch weekenlang wodden öwerall van necks anders mehr geprot. Pötters Drüj wor defrejen on die jonge Lüj op öhr klein Krömken woren glöcklech för öhr ganz Lewen, wie Anneken sech dat gedach hat.

Hermann Schneider, Bucholtwelmen

2) Stechpalme 3) Buchsbaum 4) dickes Seil